

7
L 18
0

Vermanung an
 Santze Deudsche Nation / wid
 der den Türckischen Tyrannen /
 Sampt einem Gebet zu Gott / Umb
 errettunge von demselben
 Erbfeinde.

Sonderlich aber vnd fürnem
 lich / dem Churfürsten zu Brandenburg zc.
 Dedicirt vnd zugeschrieben.
 Durch Joachim Greff
 von Zwickaw.

Auch ein schöner Latinischer
 Dymnus / zu beten umb verzeihung
 vnser Missethat / zu Gott.

Anno. 1 5 4 1.

Wittenberg.

Faint, illegible text, possibly bleed-through from the reverse side of the page.

Faint, illegible text, possibly bleed-through from the reverse side of the page.

Faint, illegible text, possibly bleed-through from the reverse side of the page.

Faint, illegible text, possibly bleed-through from the reverse side of the page.

Faint, illegible text, possibly bleed-through from the reverse side of the page.



Dem Durchlauchtigsten / hoch
gebornen Fürsten vnd Herrn / Herrn Joas
chim / Marggraffen zu Brandenburg / des
heiligen Römischen Reichsertzammerer vnd
Churfürsten / Zu Stetin / Pomern / Der Cassu
ben / Wenden / vnd in Schlesien zu Crossen
Hertzog / Burggraffen zu Nürnberg /
vnd Fürsten zu Rügen / Meinem
gnedigsten Herren.

Durchlauchtigster / ho
chgeborner Churfürst / gnedig
ster Herr / R. Ch. G. sein mein
vnterthenigste / willige vnd stete
Dienste / in aller vnterthenigkeit
mit allem vleis beuorn. Gnedig
ster Churfürst vnd Herr / Nach dem itzt aber
mals aus verhengnis Gottes vber vnser grosse
sünde / sonderlich höchste vnd grössste vndanck
barkeit / gegen sein liebes Wort / Die graus
me plage mit dem Türcken sich sehen lesst vnd
ereuget. So hoch vnd sehr / das zu besorgen /
wo nicht mit eilendem vnd statlichem wider
stand / dem selben Ertzfeinde zuuor komen vnd
entgegen gezogen wird / vns vnd gantzer Deud
scher Nation / vnserm lieben Vaterland / gleich
also ergehen möchte / wie es Hungern / Oster
reich / vnd Siebenbürgen ergangen / vnd noch
teglich (Gott sey es geklagt) ergeheth.
Thun R. Ch. G. sehr wol / Christlich / Fürst
lich /
A ij

lich / vnd hochlöblich daran / das R. Ch. G. itzt
abermal / Vngeacht vieler voriger vnd aller vn-
kosten / schwerer Reisen / mühe vñ arbeit / neben
etlichen andern Christlichen / hochlöblichen /
guthertzigem / fromen Chur vnd Fürsten / einen
Fürsten tag zur Naumburg angesetzt / Da denn
R. Ch. G. mit hochgedachten Chur vnd Für-
sten sich vereinigen vnd bereden wollen (ob
sonst vielleicht der Sachen sich niemand viel an-
nehmen wolte) Wie man doch dem grausamen
Feinde / Zuförderst mit Gottes hülffe / abbre-
chen vnd widerstehen möchte.

Sonder zweiffel R. Ch. G. als ein hoch-
löblicher Churfürst / werder vnd fromer Deut-
scher / den gedeien vnd allerbestes / des gantzen
heiligen Reichs / sonderlich gemeiner Deut-
scher Nation / vnser lieben Vaterlands / gantz
gerne sehen wolten / Auff das ja dasselbige /
erstlichen in Gottes Wort (welchem dieser ab-
gesagter vnd Erbfeind sonderlich gehessig vnd
zu widder) vnd sonst auch darnach zum andern
friedlich vnd einig erhalten möchte werden /
In behertzigung / so der grausame Feind (wie
angefangen) vberhand neme / was für jamer /
angst / vnd elende not / in Deutschland (wel-
ches doch sonst on das / durchs Teuffels vnd sei-
ner Glieder wüten / vnruig itzt genug gemacht
ist) werden würde. Sintemal den auch in vorie-
ger zeit ehemals vor Wien / R. Ch. G. Christo-
lich vnd Fürstlich / für dasselbige vnser Vater-
land /

land / wider diesen vnsern Erbfeind / gestritten /
darinnen sich R. Ch. G. durch Gottes hülffe /
mit abschlagen etzliches seines gottlosen volcks /
Kitterlich vnd Manlich für allen bewiesen /
welchs R. Ch. G. auch noch heut zu tag hoch
löblich nach zusagen / Vnd darumb gros rhum
ehr vnd preis zu geben ist.

Auff das aber R. Ch. G. oder jemand nicht
gedencken möcht / das ich solchs R. Ch. G. zu
liebkoßung thete (denn solchs ja Land vnd schier
Weltrüchtig gewis vnd war ist) So geschicht
es der meinung / Gnedigster Churfürst / Weil
R. Ch. G. solchen grossen jamer jens mal in
den Landen dort gesehen vnd vermarckt / den
selben auch mehr / denn andere behertzigen kön
nen / das ich (wiewol der der allervngeschickste
vnd vnuerstendigste) R. Ch. G. doch auff's al
ler vnterthenigste / ja vmb Gottes willen bitte /
R. Ch. G. neben allen itzt versamleten Chur
vnd Fürsten / wollen als der vleissiger vnd emsi
ger betrachten / vnd mit zeitigem gutem Rat
handeln vnd darob sein / vngeacht aller welt
vnd danckbarkeit / das das arme Deudsche Land
in fried vnd einigkeit bey euch allen / vnd irer
Christlichen Oberkeit bleiben / vnd nicht vnter
den grausamen Tyrannen / vnd verfolger Chri
sti vnd seines heiligen Namens / komen oder ges
deien möchte.

Derhalben ich auch diese meine Reim /
A iij durch

durch bitte vnd vermanung etzlicher guthertzigen / fromen Christen / an gantz Deudsch Nation / nach meiner von Gott entpfangen gnad vnd Gaben gestellt. Auch mit radt vnd eingebung etlicher hoher Leute / so mich solche meine Keim / E. Ch. G. zu zuschreiben geheissen. Dedicir ich diese meine Schrift vnd kleines Dpusculum / E. Ch. G. als meinem gnedigsten Herrn / in aller vnterthenigkeit. Des verhofens / E. Ch. G. Nachdem sie von natur eines angeborenen / Fürstlichen / friedtsamen / güttigen / vnd sonderlich Christlichen gemüts gewest sein / je vnd allezeit. Ewer Ch. G. werden diese meine Schrift vnd Keim / sonderlich weil sie zu friede / vnd zum aller besten vermanen / auff's gnedigste annemen / welchen E. Ch. G. ich mich hie mit vntertheniglich neben meinen geringen / doch geflissenen Diensten / gantz vnd allezeit willig thu befehlen.

Ewer Ch. G. wolle der liebe Gott / durch seinen allerliebsten Son Ihesum Christum / an Leib vnd Seel / Gut vnd Ehr / mit allen E. Ch. G. Verwandten / zu sampt allen hochlöblichen / fromen Chur. vnd Fürsten / so itzt zur Naumburg bey E. Ch. G. versamlet / frisch vnd gesund / mit aller wolfart begnaden vnd beschützen. Auch in rechtem erkentnis seiner ewigen Wahrheit behalten ewiglich. Vnd sonderlich gebe ja der liebe Gott E. Ch. G. sampt allen andern versamleten Chur. vnd Fürsten /
in ewren

in ewren sin vnd gemüte / was zu Friede vnd
einigkeit / vnd zu errettung vom Türckischen Ty
rannen / vnserm Erbfeinde dienen vnd gedeien
möchte / Zu lobe vnd preis seines heiligen / Göt
lichen Namens / Vnd zu vnser aller seelen
heil vnd seligkeit / Amen. Geben zu
Dessau / Donnerstag nach
Francisci / Anno.

1541.

L. Ch. G.
vntertheniger

Joachimus Greff
von Zwickau.

8078

Vermanung an gantze Deudsche Nation / wider den Türcken / sampt einem Gebet zu Gott / vmb errettung von dem selben Feinde.

Ach nu mein liebes Vaterland/
Ist es denn nicht schier zeit zu handt/
Du werde Deudsche Nation/
Mach dich doch schier wol auff die ban/
Die höchste not / die höchste zeit
Fürwar dir auff dein halse leit/
Gott kompt vnd hat herfürer gsucht
Sein scharffe Rut vnd gschwinde zucht/
Sie ist dir doch noch nie so nah
Gewest / Ach ach wir haben ja/
Solch straff vnd scharffe Rute zwar
Alle woll verdienet fürwar/
Durch vnser gros vnd anckbarkeit
Damit so gar zu vnser zeit/
Das heilig Euangelion
Verachtet wird von yderman/

Ach lieber Gott in deinem Reich
Wir haben ja alle zingleich/
Hierinnen sehr vbel gethan
Sehr vnd gros verschuld / man bey man/
Fraw / Kinder / leider / jung vnd alt
Beid arm vnd reich / gar manichfalbt/
Haben wir dich erzürnet zwar
Man kans nicht alles sagen gar /
Wie gros vnd sehr viel doch nur sein
Vnser vnd der gantzen Welt gemein/

Sünde

Sünde vnd schwere missethat
Doch Herr Got/größer ist dein gnad/
Größer ist sie vnd one end
Dein arme Christenheit bekend/
Das sie gesündigt hab schwerlich
Ach Herr vergib das bit wir dich/
Es rewet vns sehr von hertzen
Büssen wollen wir mit schmerzen/
Vnd vns recht schicken in die sach
O Deutsche Nation/tracht nach/
Trachte im nach zu tag vnd nacht
Vnd gib du doch ein mal gut acht/
Auff Gottes Wort/Las dirs hienein
Gehen wol in das herze dein/

Es sagt dir ja vnd zeigt dir klar
Alle dein sünd so offenbar/
Gibt dir rat vnd weis darneben
Wie du zu dem ewigen leben/
Durch dis lebn hin durch dringen solt
Auff das dir Gott müg werden hold/
Vnd deiner sünd werdst los vnd quit
Vnd bringt das Euangelion mit/
Durch den glauben an Ihesum Christ
Du aber so vndanckbar bist/
Schlegst solchs alles dahin in windt
Vnd dir solch trewe warnung sindt/
Nur lautter spot/Welch du daher
Bey zwentzig jaren vnd lenger/
Gehöret hast/nimpst sie nicht an
Gotts wort dich nicht bereden kan/
Das du von sünden abelift

B In

In welchen du doch so gar bist/
Erseuffet bis vber die ohren
Hastus gehört? Ich sage zunorn/
Wenn wir noch izund buss thetten
Mit rechtem ernst fur Gott tretten /
Hötten im sein zorn ab/ Hör mich
Er wer vns gnedig sicherlich/
In welcher stund (spricht Gott der **HERR**)
Der Sünder büßt/ vnd reut in sehr/
Was er vbel begangen hat
Wil er im mitteilen sein gnad/
Gott wils im vergeben vnd schencken
Vnd dasselb nimermehr gedencen/

Können wir nu solch zusag fassin
Als dann wir vns nicht dörffen lassn/
Grawen / Dörffen nicht erschrecken/ **Nein**
Besondern wir sollen stetz sein/
Eins frölichen hertzen/ anders nicht
Vnd haben diese zuversicht/
Gott sey vnser gnediger **HERR**
Werden wir aber nicht frömmere/
Sondern erger von tag zu tag
So hör vnd merck was ich dir sag/
Lieber schaw nein ins Ungerlandt
Wer kompt dorther zu vns gerandt?
Wol nach dem Land zu Osterreich
Ir lieben Deudschen ich bitt euch/
Behertzigt doch die newe mehr
Welche vns komen izt daher/
Aus diesen landen alzumal
Aus siebenbürgen/ Mercket all/

Was

Was jammer / angst / vnd grosse noe
Die armen leut jzt troffen hat /
Dergleich die ganz Schlesi schir
Gewartten mus / vnd darnach wir /
Gleubts doch das vns gleicher gstate
Auch so ergehen kan gar baldt /
Man hör doch wie von tag zu tag
Allzeit vnd immer grösser klag /
Grösserer schaden wird erfarn
Der grausam Feind kein fleis thut sparn /
Er kompt jmer neher herzu
Durch Gotts verhengnis / in ein nu /
Sitzt er bey vns für vnser thür
Wir wollens han / wer kan dafür ?

Lieben Herren thut zun sachen
Es darffs fürwar keiner lachen /
Last vns ein anders leben fein
Anfahen / vnd vns schicken drein /
In die sach des Euangelij
Mit recht ganzem ernst / Nicht als wie /
Wie wir fur gethan / Nicht last vns sein
Christen nür mit dem Mund allein /
Last vns fliehen der laster viel
Fürwar vns Gott gnedig sein wil /
Last vns sein Wort lieben vnd ehren
Er kan allen Feinden wol wehrn /
Doch mus vnser hülff darbey sein
Darumb jr werden Fürsten fein /
Euch Deudsche Knaben mein ich zwar
Achtets doch für kein schimpff so gar /
Ich wil euch geben gutte lehr
Wie doch der sachen zu thun wehr /

B ij

Erstlich

Erstlich hört / Verlasset euch nicht
Auff ewer sterck vnd hauffn mit icht /
Auff ewer Ros vnd harnisch planck
Lange spies / die thun im kein dranc /
Auch grosse büchsen one zal
Fürwar fürwar jr irrt euch all /
Dis alles machet es nicht aus
Es machet wol ein grossen praus /
Vnd ist wol war / Deudsch Nation
Dieselb vermag manch feinen Man /
Aber in Gotts namen / Hört mich
Vnd in seiner Furcht / gewislich /
Das thut fürwar kein Sicherheit
Gottes furcht / die gibt glück dem Streit /
Eben so wol als anderm ding
Man mus den Feind nicht achten gring /
Vermessenheit bringet kein gut
Dieser Feind (gleub dus) was er thut /
Das thut er stetz bedechtiglich.

Zum andern hör nu ferner mich /
Wir meinen auch mit vnserm Rat
Mit vnserm bedencen gar drat /
Wolln wir der Christenheit aus not
Zelffen / Ja wol / Tieffer in kot /
Fürren wir sie jmer hinein
Ehe wir Deudschen fertig sein /
Ehe wir vns beratschlagt han
Wie viel Gelt vnd auch wie viel Man /
Von nöten sey zuschicken hin
Ehe wir vns rüsten vnd auszihn /
So ist die best schantz versehn gar
Vnd wird auch offte fürwar fürwar /

Mehr

Wahr gelt verzert in Ratschlegens
Dann die Summ die man sol legen.

Vnd so wir nu eins fertig sein
So komen wir getrot/ heut ein/
Morgen aber ein Part/ zwey/ drey
Vnd wiltu wissen wie im sey/
Dann zwacht der Feind allmelich hin
Ein part nach dem andern/ den gwin/
Han wir vnser Ratschlagens dan
Vnd wollen noch wol iezund han/
Nicht mehr dann so viel/ vnd so viel
Fürwar fürwar wers glauben wil/
Es heisst dis Gott versuchen schier
Geschichts aber das ja komen wir/
Etwan mit einer hülff/ Welch ist
Ansehlich/ stadlich/ vnd nicht gbrist/
An volck/ an sterck/ an hülff/ Als dann
Macht sich der Feind gar bald daruan/
Wie er dann all sein thun gestellt
Nur auff die flucht / Dann ist das gelt/
All kost vnd müh aber verlorn
Wie so 2 vrsach/ Wir sein solch thorn/
Wir folgen nicht/ fürchten so sehr
Wir verirtn vns / das wir nicht mehr/
Möchten komen in vnser Landt
Vnd zu dem guten Wein zuhandt/
Zur schwelgerey/ Lassens also
Gut sein/ vnd sein dann alle fro/
Sehr fro/ das wir des Feinds los sein
Solang bis er widder herein/
Vnd entlich in gantz Deudsch Landt
Kompt/ vnd komen wird allzuhandt
Es gleubets aber niemand nicht

B ij

Dant

Dann zum dritten sey des bericht/
Da meint niemand das in angeht
Jder auff dieser meinung steht/
Vnd lesst sich hören frey also
Ja/ der Türck ist noch lang nicht do/
Es ist noch zwischen jm vnd hier
Ein grosser weg/ glaub sicher mir/
Wir wollen noch wol Gladen essen
Ein mal/ zwey/ drey/ Solt er vns fressn?
Nein zwar/ Hat noch lang kein feil nicht
Da ist dann ein ander/ der spricht/
Warumb schickt der nicht erstlich an?
Was hab denn ich viel mehr daruan/
Dann dieser vnd jener Fürst? Traun
Wird es vns nicht ein mal geraun/
So glaub du mir keins worts nicht mehr
Wol dem nur/ der wol von hier wehr/
Warumb? Darumb/ Diese sind die
Welch ich izt hab erzelt alhie/
In dem andern vnd dritten Teil
Ich wett mit ein das nicht viel feil/
Etlich sind drunter/ feilt nicht viel
Wie ich dir izund sagen wil/
Die den Türcken ganz gerne nur
Wolten wünschen vnd sehen hier/
Als nemlich etlich Papisten
So sie nur weis vnd weg wüsten/
Wie sie in solten bringen herein
Darüber auch sonderlich sein/
Die Junckern aus den Nordbrennern
O die hetten den Türcken gern/
Vber die Lutherischen Knaben
Sie sehen in gern rein draben.

Man

Man sagt darvon/ Seht zu jr gselln
Bewart ewr Selen für der helln/
Ir habt getobt/ gebrandt genug
Man hat euch bisher den vnflug/
Gestattet/ vnd geschencket nach
Seht zu vnd nempt war ewer Sach/
Ir dempfft doch Gotts wort nimer mehr
Vnd wenn jr gleich vber vns her/
Den Türcken bröcht vnd brengen künde
Dis aber euch besser anstündt/
Das jr mit vns den lieben Gott
Hörtet/ Das er vns für der not/
Darmit die armen Leut izt sein
In Vngern/ Osterreich gemein/
Vnd andern örtern bschwert gar sehr
Das er dieselbig von vns Lehr/
Durch Ihesum Christum seinen Son
Vnd helff vns selber widderstan/
Diesem so wütigem Feind do
Solget doch vnd thut im also/
Solget lieben Herren folgt schir
Lernt den Feind kennen/ Seht euch für/
Wert doch schir klug mit schaden nu
Merckt vnd hört mir alle zu/
Lasset euch raten wer do kan
Nempt guten Rat von jderman/

Dieser Feind vns zu listig ist
Sein sin vnd gmüt zu aller frist/
Ist für war anders nichtes nicht
Dann Krieg/ Da ist er hin gericht/

Er

Er fleißt sich des von jugend an
Das er alles wol leiden kan/
Das können wir nicht/ Deudsche füll
Allzeit volauff/ gnug haben will/
Leiden müssen wir lern/ hitz/ keldt
Hunger vnd durst/ ligen zu feldt/
(Du sprichst/ Solchs sind vngewohnt wir)
Nicht ein Monat/ drey oder vier/
Sondern jar bey jar/ tag bey tag
Dis möcht es thun/ wie ich dir sag/
Müssen folgen/ ablassen nicht
Vnd allzeit sein der zuuersicht/
Gott werde vns vnser Feindt
Vnd all die vns entgegen seind/
In vnser Hand gewislich gebn
Stetz dran gehenht/ So vnser lebn/
In besserung gestellet ist
O Deudsches Land so du dir list/
Solchs zu hertzen gehen/ Vnd dann
Griffst den Feindt nur taffpffer an/
On vermessenheit (auff das ich dirs
Widderhole/ gleube du mirs)
On versuchung/ Auch nicht mit wunden
Martern/ schendung Gottes all stundt
(Wie dann der Deudschn gwonheit ist)
Du hettest Sieg zu aller frist.

Wir wolln dann den Feindt gleich lan
Voch vnd noch so viel volcks han/
Sebel Karthunen / vnd Schlangen
Wir wolln an Gottes wort hangen/
Dis sol vnser Friedeschildt sein
Wie spricht der liebe David fein :

Jene

Jene verlassen sich auff Wagen
Vnd Rosse/ David thut sagen/
Wir dencken an des **HERREN** namen
Des **HERREN** vnser Gottes Amen/
So wollen wir auch sagen fein
David sol vnser Meister sein/
So würd der Feind gstürzt/ Anders nicht
Wir aber stünden auffgericht/
Der **HERRE** hülff vns fürwar fürwar
Er hat es vns ja zugesagt zwar.

Derhalben jr zarten Fürsten gut
Deutsch Nation du edels blut/
Ir taffern Helde wolgeborn
Seht an des Feindes grossen zorn/
Ir Gstrengte Ritter / Herrn vnd Knecht
Seht das ein jder tapffer fecht/
Verteidigt ewre Vaterlandt
Die jr izt werd dahin gesandt/
Nempt euch ein frischen freien mut
Wils Gott/ es wird alles wol gut/

Jr andern hört / Schickt jmer nach
Mehr Gelt vnd Man/ Vnd denckt/ die sach/
Gehe euch auch gleich so wol an
Als seht jr den Feind daher gan/
Es bründt itzund deins Nachbarn wandt
Bald istts Feuer bey dir zuhandt.

Ich sag zum dritten bessert euch
Vnd dancket Gott im Himmereich/

C

Fürs

Fürs Euangelium / Nempt das an
So irs bisher noch nicht gethan/
Disputirt nicht obs Gottes wort sey
Ob man jm denn sol fallen bey/
Ob man den Priestern sol die Ehe
Vergünmen / Das man hin geh/
Nach Christi wort zum Sacrament
Vnter beider gstat / wie mans nent/
Ob solches recht sey oder nicht
Ander ding mehr / Weil solchs geschicht /
Weil man vom Concilio frage
Weil der dis vnd jener das sagt /
Richt man nichts aus / Man verzerts gele
In des so leit der Feind im feldt /
Zeuht dir vber den hals daher
Drumb merck dis / Ich sag dir nicht mehr.

Ist einmal war / Das Gottes wort sey
Bistu nür klug so bleib darbey /
Seist wer du seist / Schaw auff dein sacht
Kims an / gleub jm / richt dich darnach /
Es ist beschlossen lengst bereit
Dort (mein ich) dort zu jener zeit /
Do man hort des Vaters stim
DER SOLT ICH HÖREN (Christum ver-
So hats auch Christus selber dich nim)
In sein Abendmal versteh mich /
Geheissen vnd gebotten hart
DAS THUT / Ist gnug von diesem Part

Das ander von der Priester Ehe
Wo dasselbig geschrieben steh :

Ehbrechn:

Ehbrechn soltu nicht/ Gott selbs sprich
Ist dir aber solchs gnugsam nicht?
Als dann dir nicht zu raten steht
Sonst/ was Ceremonien angeht/
Dasselbig schickt sich selber wol
Das man die darumb halten sol/
Concilia/ Lya fürwar
Der rede ist es nicht werd zwar/
Christus gebent dir nichts darvon
Dis aber thu/ jens magstu lon/
Sein Wort mustu hören bey gfar
Deiner selen seligkeit zwar/

So aber Gottes wort nichtes gilt
Bey dir / vnd solchs nicht hören wilt/
So hör ins Teuffels namen dann
Den Türcken/ vnd las dich todschlan/
Las dir schenden dein Weib vnd Kind
Wies die Landt innen worden sind/
Vngern/ Osterreich/ Siebnbürg/ Vnd
Gar nah wie auch zu aller stund/
Befürchten müssen allzugleich
Ach lieber Gott im Zimelreich /
Was jamer/ elend/ schwere pein
Würd dirs in deinem hertzen sein/
So du solst für dein augen sehn
Dein Kindt am pfal stecken vnd stehn/
Eins teils auff kleine stück zerhockt
Aus mütterleib (welchs Gott geklagt)
Geschnitten/ Ist jemmerlich zusehn
Traum so pflegts/ nicht anders zu gehn/
C ij Wem

Wem dis gelibt/ der wirbs erfarn
Doch wollen wir keinen fleis sparn/
Wolln beten aus innigem Hertz
Gott woll vns solcher not vnd schmerz
In Deudsch Landen vberheben
Wir wolln fürbas vnser leben/
Bessern/ Helffs vns alln zusammen
Gottes ewige gnad/ Amen.

Zum beschlus/ Hör mich noch ein wort
Welchs ich von vielen offte gehort/
Spricht mancher/ Ho/ las komen her
Sey der Touffl odder sein Mutter/
Es sey der Türck odder wers wil
Es gilt mir doch gleich eben viel/
Vnter was fürn Herren ich sey
Sagt man doch/ Er las idem frey/
zu glauben/ was vnd wie er woll
So einer nur thut was er sol/
Das ist/ so er im hulden thut
Als dann so hats ein ider gut/
Vnd wil sichir sagen besser zwar
Dann vnter den Papisten dar/
Vnter ein Mordbrennischn Tyran
Ja/ Merck das/ Solt mich so verstan/
Ist alles war/ Ich fall dirs zu
Drey ding aber sag ich dir nu/
Welche gar bös am Türcken sein
Hör zu/ Ich wil dirs sagen fein

Er lesst ein glauben was ein gfelt
Vergünt auch das man Messe helt

Ceremo

Ceremonien ist er vol
Aber das feilet / Merck das wol /
Kein Predig lest er gehen nicht
Wo aber das mündlich wort gbricht /
Wie stehen dann die Christen ? Wie ?
Wo bleibet der spruch Pauli hie ?
Der Glaube kompt aus dem gehör
Wenn wir dann nichtes hören mehr /
Von Christo vnserm lieben HERN
Ach wie lang (sag mir) vnd wie fern /
Wil sich erhalten der Glaube dein ?
Wie viel wolln Christn bleiben vnd sein ?
So sie durch die Prediget nicht
Werden in Gotts wort vnterricht ?
So du nichts denn Abgötterey
Sehen müstest für augen frey ?
Zum Heiden würdstu bald mit in
Zum Teuffel müstn wir all dahin /

Zum andern merck das auch gar frey
Wie listig doch der Teuffel sey /
Die allerfeinsten Kinder zart
Welch in duncken von guter art /
Die verstendig vnd gelernig sein
Die list er aus / Vnd bleut in ein /
Von jugend auff sein Alkoran
Lert sie denselbigen verstan /
Vnd weist sie so von Gott dem HERREN
Zum Mahomet / O wie gar fern /
Von vnserm lieben Christo sein
Dem Teuffel in den rachen nein /

C ij Las

Las mir das sein ein jamer gros
Darmit die armen Kind / so blos /
On witz / on verstandt mit list dar
Werden verfür so ganz vnd gar /
Du kōnst dein Kind / Cathechismon
Leren izt / auff das es gar schon /
zu Gott keme ins Himelreich
Ja wir thun es gar seuberleich /
Traun / So mus dort lernen hör mich
Des Türcken ler / Vnd ewiglich /
zum Teuffel faren in die Hell
Bedencf doch den jamer mein gsell /
Sie werden von jm Casirt darzu
Wer wolt doch solches lachen nu
Er nimpt sie all mit gwalt dahin
Nemlich also / mit solchem sin /
Gleich als für ein zehenden / Ach
Ist das nicht ein elende sach

Zum dritten ist das auch nicht gut
Das der Türck dis gemeinglich thut /
So er nu hat genomen ein
Ein Stad / ein Landt / Vnd wo dann sein /
Die ergstn Tyrannen omb vns her
(ist gewis / anders nicht thut er)
Dieselben setz er vns zu Herrn
Dann kein Oberkeit leidt er gern /
Er rott sie aus mit Kindes Kind
Vnd leidt keine wo ers find /
Nur Tyrannen die jm gleich sein
Dieselben für in dienen sein

Sonderlich,

Sonderlich die von Gott abfallen
Sein im die liebsten vnter alln/
Die Mamelucken hat er gern
Aus in macht er die grösten Herrn/
So sie die Christen wol plagen
Thuts im von hertzen behagen.

Nu diese drey puncte wol an
Las du dir wol zu hertzen gan/
Sonderlich den ersten/ hör mich
Warumb? Ich wils vnterrichten dich/
Es gieng noch alles hin fürwar
Ob er vns gleich die Kinder gar/
Zu tode schlug/ lies keines lebn
Ob wir darnach gleich auch darnebn/
Geplagt würden/ vnd müsten viel
Leiden/ on alle mas vnd ziel/
Denck du aber den ersten nach
Obs nicht ein jemmerliche sach/
Das er den Christen namen gar
Auszurotten gedenckt fürwar/
Dahin ist er nemlich gericht
Das Gottes wort in sehr ansicht/
Dis denckt er zuuertügen ganz
So der Teuffel köndt diese schantz/
Brechen/ glaub mirs/ das im lieb wer
Durchs Teuffels eingebn wüttet auch er/
So ganz vnd gar zu tag vnd nacht
Wer nu ein Christ ist/ der betracht/
Was da fur Hertzleid vnd elend
Wird vnter vns sein on end.

C iij

Alles

Alles wer zuerschmerzen zwar
Vnd zuvergessen sag ich furwar/
Aber kein Gotts Wort hören mehr
Solt jder wünschen das er tod wer/
Wie betrübt gewissen würden da sein
Denck nu wol an im hertzen dein/
Ob man nicht solt solchem Tyrann
Mit allen krefften widerstan
Gott bitten inniglich allzeit
Das wir möchten werden gefreit/
Auff das wir doch nicht sein geschrey
Sein Teufflich Abgötterrey/
Ein mal hören müsten vnd sehn
Wie ich leider fürcht das wird gsehen/
Wie dann auch hie ein tapffer man
In seinem brieffe zeiget an/
Den du lieffest alhie zu end
O lieber **HERR** Gott dein zorn wend/
Von was armen Creaturn dein
Wir bitten dich igt all gemein/
Wir kommen für dein ansicht do
Sprechen eintrechtiglich also/

Ein Gebet.

Des Türcken/ welchs dein Straff ist
Sein wir ja werd zu aller frist/
Verschon aber **HERR** verschon
Bitt wir durch Christum deinen Son/
Sey vns gnedig O lieber **HERR**
Verlas vns doch nicht so gar sehr/

Auff

Auff das wir nicht versagen gar
Für dem grausamen Feinde dar/
Züchtige vns in deiner güte
Ob vns dasselbige weh thut/
Las vns durch die Straff bewert werdn
Auff das dennoch Samen auff Erden/
Überbleibe vnter vns hier
In deiner Christenheit bitten wir/
Wie du zugesagt vns allen
O HERR Gott thu solchs zu gefallen/
Deinem aller heiligsten Namen
Darzu sprech jderman Amen.

Ende.

C v EXEPI

EX EPISTOLA EGREGII GRA
uiscꝫ cuiusdam uiri, ad Princiꝫ
pem quendam.

NOVA horrenda, deslenda, nobiscum sunt de
Turca truculentissimo Christianorum ho
ste, Is obsessus Budam, nostros Milites omnes
ferme crudelissime prostrauit, trucidauit & ex
tinxit, eripuitqꝫ omnes nostris machinas bellicas,
& com meatum maximum, grassaturqꝫ indies in
Christianos magis, ac magis, Quorum maxima
pars omisis possessionibus consulit sibi fuga. Ipse
crudelissimus Hostis nobis uicinior redditur.

O nos cœcos, miseros, calamitosos, qui disputa
mus, An Euangelio sit credendū? An sacrificulis
liceat legitimas habere uxores? uel impurum cœ
libatum? Et de id genus alijs. Et quod nolumus au
dire Christum & eius uerbum, cogimur audire di
abolicas vociferationes Turcæ & Bombar
das, uidemusqꝫ in nos & Fratres ferrum
stringere. O cœlum, o terra,
quæ nos dementia cœ
pit? &c.

H Y M N V S.

Aufer immensam Deus aufer iram,
Et cruentatum cohibe flagellum,
Nec scelus nostrum properes ad æquam
Pendere lancem.
Si luant

Si luant iustam mala nostra poenam
Quis potest seuas tolerare plagas,
Cum nec ultricem spaciofa ferret
Machina uirgam.

Parce sed nostris miserando culpis
Ius pari clemens pietate miscens,
Cui manet semper proprium maligno
Parcere mundo.

Cur super uermes luteos furorem
Sumis, o magni Fabricator orbis,
Quid sumus, quam fex putris, umbra, puluis,
Glebaq; terræ?

Nos parentales maculant reatus,
Et caro mentem trahit imbecillam,
Ergo tam sortem fragilem benigno
Inspice uultu.

Da crucem, clauos, scuticam, coronam,
Lanceam, funes, rigidamq; mortem,
Inter iratam moderare dextram
Et mala nostra.

Non opus summi pereat Magistri
Nec sinas cassam fore Palsionem
Corde, sed manans, lauet omne crimen
Sanguis & unda.

Hoc ratum quo sit, facias precamur
Omnibus nobis, residens, olympto
Qui, Deus, semper dominaris orbi
Trinus & unus.

AMEN.

Gedruckt zu Wittemberg/
durch Veit Creutzer.

1 5 4 1


77 L 1059

ULB Halle 3
002 814 129



56.





Vermanung an

Santze Deudsche Nation / wid
der den Türckischen Tyrannen /
Sampt einem Gebet zu Gott / Vmb
errettunge von demselben
Erbfeinde.

Sonderlich aber vnd fürnem
lich / dem Churfürsten zu Brandenburg zc.
Dedicirt vnd zugeschrieben.

Durch Joachim Greff
von Zwickaw.

Auch ein schöner Latinischer
Dymnus / zu beten vmb verzeihung
vnsrer Missethat / zu Gott.

Anno. 1 5 4 1.

Wittenberg.

